

La Prognostication: & amples prédictions à tousjours & jamais à commencer de ceste  
presente année. Composee ... par Mesaire Panthalamus.

Publisher/year G. de Nyverd: Paris, [1560?]

Physical descr. 12<sup>o</sup>.


British library

Shelfmark 12331.b.14.



La Prognostication : &  
Amplés Predictions, à tous-iours &  
iamais, à commencer de ceste  
présente Année.

*Composée & calculée par Mesaire  
Panthalamus, grand Docteur en Argo-  
rine, Residant es Villes Recreatives &  
Ioyenses.*



A PARIS,

Par Guillaume de Nyuerd, Impri-  
meur & Libraire.



A TRES HONORE SEI-  
gneur de Plaisir requerant, don-  
ne salut & paix en Je-  
sus Christ.

**M** Onseigneur, considerant infiniz abus auoir estez  
perpetrez par aucuns qui se sont vouluz ingerer  
faire des prognostications soubz la cheminee ou à  
l'ombre d'un verre de vin, i'ay biẽ voulu en calculer vne  
perpetuelle & generale (contenãt 6 chap. avec la decla-  
tion des iours de la sepmaine) laquelle (mondit seigneur)  
i'espere que la trouuerez la plus seure & plus veritable  
que fut oncques veuë en lieux ny cours de plaisance, cõme  
l'experience vous le demõstrera: car sans doubte veu q̃ dit  
le Prophete Royal à Dieu. Psal. 5. Tu destruiras tous ceulx  
qui disent mensonges, ce n'est pas legier peché, de mentir  
ainsi à son escient, & ensemble abuser le pauvre monde,  
qui est curieulx de scauoir choses nouuelles, comme de tout  
temps ont esté singulierement les François, ainsi qu'e scrit  
Casar en ses commentaires & Jean de Grauot en My-  
thologies Galliques, ce que nous voyons encores de iour en  
iour par Erãce, ou le premier propos qu'on tient à gens  
freschement arriuez, sont quelles nouuelles? Sçauetz vous  
rien de nouveau? On y dist: Qui bruit par le monde? Et  
cãt y sont attẽtis, que souuẽt se courroussent cõtre ceulx  
qui viennent de pays estranges sans apporter plaines  
bougettes de nouuelles les appellant deaulx & idiots.  
Si doncques cõme ils sont prompts à demander des nou-  
uelles, autant sont ils faciles à croire ce que leur est annõ-  
cẽ, debueroit on pas mettre des gens dignes de foy à gar-

ges à l'entree du Royaume, qui ne seruiroient d'autre chose, sinon d'examiner les nouuelles que lon y apporte, & sçauoir si elles sont veritables? Ouy certes. Et ainsi a faict mon bon maistre, le Seigneur de mente par tout le pays de Tropic & Dispodye. Aussi luy en est il si bien prins, & tant prosperé son territoire, qu'ils ne peuuent de present sauancer à boire, & leur conuiendra espandre le vin en terre, si d'ailleurs ne leurs vient renfort de beueurs & bons raillars. Voulant doncq' satisfaire à la curiosité de tous bons compaignons i'ay reuclé toutes les Pâtarques des cieulx calculée les quadrats de la lune crochetté tout ce que iamais penserent tous les Astrophilles Hypernephylistes, Anemophilaces, Vranopetes, & obrophores, & conferé du tout avecq' Empedocles, lequel se recommande à vostre bone grace. Et tout le tualtem ay icy en peu de chappitres redigé, vous assurant q' ie n'en dis sinon que i'en pense, & n'en pense sinon ce que en est, & n'en est autre chose pour toute verité q' ce qu'en lirez. Ce que sera dit au par sus, sera passé au gros tany à tors & à trauers, & par aduerture aduiedra ou par aduerture n'aduiedra pas, d'un cas vous aduertis, que si ne croyez, le tout vous me faictes un tresmauuais tour dont serez pugniz icy ou ailleurs. Or mouchez voz nez, petis enfans & vous autres vieulx resueurs affustez, voz besicles & pensez, bien ces motz.

Fai& lan & iour que dessus.



M.

Panthalamus.

*¶ Du Gouverneur & Seigneur de ceste  
presente Année. Chap. 1.*

**Q**UELQUE chose que vous disent ces folz Astrologues ( qui se disent ) de Louvain, de Nuremberg, de Tubinge, de Lyon: ou autres lieux, ne croiez point que ceste Année il y ayt autre Gouverneur de l'vniuersel monde que Dieu le createur, lequel par sa diuine parolle tout regist & modere, & par laquelle sôt toutes choses en leur nature, propriété & cōdition, Et sans la maintenance & gouvernement duquel toutes choses seroyent en vn moment reduictes à neant, cōme de neāt elles ont esté par luy produictes en leur estre, car de luy vient, en luy est, & par luy se parfaict tout estre & tout bien, toute vie & mouuement, Comme dict la trompette Euāgelique mōseigneur Sainct Paul. rom. ii. Dōcques le gouverneur de ceste pre-

sente année, & toutes autres selon nostre veridiq̃ resolution sera Dieu tout puissant. Et n'aura Saturne ne Mars: ne Iupiter: ne Sol, ne Venus, ne autre planette, Certes non pas les Anges ny les sainctz, ny les hommes: ny les dyables: vertus, efficace, puissance ne influence aucune si Dieu de son bõ plaisir ne leur donne. Cõme dict Auicenne, que les causes secondes n'ont influence n'action aucune sy la cause premiere ny influe.

¶ *De l'Eclipse de ceste Année. Chap. 2.*

Ceste année sera Eclipse, Saturne sera retrograde, Venus directe, Mercure inconstãt, Et vn tas d'autres planettes n'yront pas comme vne autre fois, dont pour ceste année les chantres yront de costé, & les cordiers a reculõs les escabelles monteront sur les bācz, les coussis se trouuerõnt au pied du liẽt Les genitoires pēdrõnt à plusieurs par



faulte de gibetsiere, le ventre ira de-  
uant, le cul s'asserra le premier, lon ne  
pourra trouuer la feue au gasteau des  
Roys, lon ne rēcōtrera point d'ars aux  
flux, les dez n'aduiēdrōt point à soub-  
het quoy qu'ō les flatte: les bestes par-  
leront en diuers lieux. Carême gai-  
gnera son proces si son Edict est bien  
obserué. Lune partie du monde se de-  
guysera pour tromper l'autre, lon ne  
veit oncq' tel desordre en nature.  
Et se feront ceste année plus de xxvij.  
verbes anormaulx si Prisciē ne les tiēt  
de court. Si Dieu ne no<sup>r</sup> ayde nous au-  
rons prou d'affaires. Mais au contre-  
point fil est pour nous rien ne nous  
pourra nuyre cōme dit le celeste Astro-  
logue, qui fut rauy iusques au ciel. Ro.  
8.c. Si Deus pro nobis quis cōtra nos.  
*¶ Des maladies de ceste année. Chap. 3.*  
**C**Este année les Aueugles ne verrōt  
que bien peu, les soudz orront as-

fez mal, les muetz ne parlerōt gueres,  
les riches se porteront vn peu mieux  
que les pauvres, & les sains mieux que  
les malades. Plusieurs moutons, beufz  
pourceaux, oysons, pouletz, & canars  
mourront, & n'y aura pas si cruelle  
mortalité entre les Singes & Droma-  
dayres. Vieillesse sera incurable ceste  
Année, à cause des Années passées.  
Ceux qui seront pleuretiques auront  
grand mal au costé. Ceux qui auront  
flus de ventre yront souuent à la selle  
percée. Les catterres descéderont ceste  
Année de cerueau es membres inferi-  
eurs. Regnera quasi vniuersellement  
vne maladie biē horrible, redoutable,  
maline, peruerse, espouventable & mal  
plaisante, laquelle rēdra le monde biē  
estonné: & dont plusieurs ne scauront  
de quel boys faire flesches, & bien sou-  
uent cōposeront en rauasserie sylogi-  
sans en la pierre philosophalle: & l'ap-

pellent Auerroys. vij. collibet Faulte d'argent, Et attendu la comette & la retrogradation de Saturne, mourra à l'hospital vn grand marault, tout catterré & crouste leué.

¶ *Des fruietz & biens de terre. Chap. 4.*

**I**E treuve par les calcules d'Albumasar: au liure de la grand' coniuñction & alieurs que ceste année sera bié fertile avec plante de tous biens à ceux qui auront de quoy. Mais le hobelon de Picardie craindra quelque peu la froidure, Lauoyne fera grand bien aux Cheuaulx, Il n'y aura gueres plus de Lard que de Pourceaux à cause de Pisces ascendant, Il sera grand' Année de Quaquerolles. Mercure menasse quelque peu le perseil, mais ce non obstant il sera à pris raisonnable. De Bledz, de Vins, de Fruietz & legumai- ges on n'en veit oncques tant si soub- haictz de pauvres gens sont ouyz.

*De*

¶ *De l'estat d'aucunes gens. Chap. r.*

**L**A plus grande folie du monde est de pēser qu'il y ait des astres pour les Roys, Papes, & grās seigneurs, plus tost que pour les pauvres & souffreteux: cōme si nouvelles estoilles auoiēt esté crées depuis le tēps du deluge, ou de Romulus ou Pharamond à la nouvelle creation des Roys. Ce que Triboulet, ny Caillette, ne diroient pas qui ont esté toutesfois gens de hault scauoir & grand renō. Et par aduēture en l'arche de Noë: lediēt Triboulet estoit de la ligne des Roys de Castille: & Caillette du sãg de Priam: mais toute ceste erreur, ne pcede q̃ par default de vraye foy catholique tenāt doncq' pour certain que les astres se soucient aussi peu des pauvres comme des riches, & des riches cōme des pauvres. Je laisseray es autres faulx Prognostiqueurs à parler des roys & riches, &

parleray de celle des gens de bas estat.

¶ Et premierement de gens submis a Saturne :cme gēs despourueuz d'argēt, ialoux, refueurs, mal pēsāns, soub-fonneux, preneurs de taupes, vsuriers, rachepteurs de rétes, tyreurs de riuetz gēs melécholiques, n'auront pas ceste année tout ce qu'ilz voudroient biē, ilz s'estudieront à l'inuention saincte croix, & ne getteront point leur lard aux chiens, & se gratteront souuent la ou il ne leur demangera pas.

¶ A Iupiter cōme cagotz, cassars, porteurs de rogatons, copistes, bulistes, dataires, chiquaneurs, moynes, hermytes, hypocrites, chatemites, barbouilleurs de Papier, chaffourreurs de parchemin, notaires, raminagrobis se porteront selon leur argent. Et tāt mourra de gens d'Eglise, qu'on ne pourra trouuer à qui conferer les benefices, en sorte que plusieurs en tiendront

deux, trois, quatre, & d'auantage.

¶ A Mars comme bourreaux, meur-  
driers aduēturiers, brigans, fergés, re-  
cors de tesmoings, gens de guet, mor-  
tepaye, arracheurs de détz, coupeurs  
de genitoires, medecins de triquenic-  
que qui se font kadeler par les rues, re-  
nieurs de Dieu, allumetiers, boutefeux  
ramonneurs de cheminées, frâctztaul  
pins, charbonniers, alkimistes, pinse-  
mailles, feront ceste année de beaulx  
coups: mais aucús d'iceulx seront fort-  
subiectz à receuoir quelque coup de  
baston à lemlée. Vn des susdicts sera  
ceste année faict Euesq̃ deschâps dōnāt  
la benedictiō avecq' le pied aux pasās.

¶ A Sol comme boteleurs de foing  
portefaix, gueux de l'hostiere, gaigne-  
deniers rauaudeurs, degresseurs de bō  
netz, emboueurs de basts, loqueteurs  
claquedens, croquelardons, generale-  
ment tous portans la chemise nouée

fus le dos seront saincts & alaigres & n'auront point la goutte aux dentz quand ilz seront de nopces.

¶ A Venus cōme femmes lubriques, ribleurs, ruffiens, caignardiers, chāberieres d'hostelerie, Nomina mulierū desinentia in iere, vt lingiere, tauerniere, buādiere, frippiere, seront ceste annee en reputation: mais le soleil entrāt en Cancer & autres sygnes se doibuent garder de verolle, de chācre, de pisses chaudes, poullains, grenetz, &c. Les nonnains à grand peine concepuront sans operation virile, & guieres de pucelles n'auront de laiēt.

¶ A Mercure, comme pipeurs, trompeurs, affineurs, theciacleurs, larrons, meufniers, bateurs de paué, maistres aux ars, decretistes rimasseurs, Bastelleurs, Ioueurs de passe passe, enchanteurs, vielleurs, oublyeurs, Poetes, escorcheurs de latin, escumeurs de mer

feront semblant d'estre plus ioyeux  
que souuēt ne seront & toutesfois ri-  
ront lors que pas n'en auront enuie,  
& seront fors subietz à faire banque  
routes s'ils ne se trouuent plus d'argēt  
en bourse que ne leur en fault.

¶ A la lune, comme bisouars, lunatic-  
ques fols, eceruelez, acariaftres, euen-  
tez, courratiers, postes, nacquets, ver-  
riers, estradiotz n'auront ceste annee  
guerres d'arrest. Toutesfois ne yront  
pas de lifrelofres à saint hiacco, il de-  
scendra grand habondāce de Micque  
lots des montaignes de sauoye, & de  
Auuergne. Mais sagitarius les Menaf-  
se des mulles aux talons.

¶ *De l'estat d'aucuns pays. Chap. 6.*

**L**E noble Royaulme de France, pro-  
sperera & triūphera ceste annee en  
tous plaisirs & delices, tellement q̄ les  
nations estrāges voulētiers s'y retire-  
ront. Petis bācquets petis esbastemēs



mille ioyeufetez s'y feront ou vn cha-  
cun prendra plaisir, on ny veit oncq'  
rāt de vins ny plus friās, force raues en  
Lymosin, force chastaignes en Peri-  
gort, & Daulphiné, force olyues en Lā-  
guedoc force poyssons en la mer, for-  
ce estoilles au Ciel: force sel en Broua-  
ge, planté de bledz, legumaiges, fruita-  
ges, iardinages, beurres, lectages, nulle  
peste, nulle guerre, nul ennemy, bren  
de pauureté, bren de melēcollie, & ces  
vieux doubles ducatz, nobles à la rose  
angelotz, & moutons à la grād laine,  
retourneront en vñance. Auecq' plan-  
té de seraphz, & escus au soleil. Tou-  
tesfois sus le milieu de l'esté sera à re-  
doubter quelque venue de pusses noy-  
res cheussions de la deuiniere. A deo  
nichil est ex omni parte beatum. Mais  
il les fauldra brider à force de colla-  
tions vespertines.

¶ Italie, Romanie, Naples, Cecile, de-

meurerōt la ou elles estoiet l'an passé.  
Ilz songeront biē profondemēt vers  
la fin du Careſme, & reſueront quel-  
ques fois vers le hault du iour.

¶ Allemagne, ſouiſſe, ſaxe, ſtrasbourg  
&c. prouffiteront s'ils ne faillēt, les por-  
teurs de rogatōs les doibuēt redoub-  
ter, & ceſte année ne ſy fonderont  
pas beaucoup d'anniuersaires.

¶ Heſpaigne, caſtille, portugal, arragō  
ſeront biē ſubiectz à certaines altera-  
tions, & craīdront de mourir biē fort  
autant les ieunes q̄ les vieux, & pour-  
tāt ſe tiendront chaudemēt & ſouuēt  
compteront leurs eſcus s'ils en ont.

¶ Autriche, hongrie, turquiē, par ma  
foy mes bons hillots ie ne ſcay cōmēt  
ils ſe porterōt & biē peu m'en ſoucie  
veu la braue entrée du ſoleil en Capri-  
cornus, & ſy plus en ſcauez n'en diētes  
mot: mais attendez la venue droicte  
du boyteux.

EXPLICIT.

¶ *La disposition du temps selon les iours  
de la sepmaine, pour ceste presente annee.*

*Et premierement.*

Le lundy premier iour de la sepmai  
ne s'il pleut cest signe que les careaulx  
seront mouilleez.

Le mardy second iour, si gelle sera  
signe de froidure, & fera grand froid.

Le mecredy iij. iour, si neige sera si-  
gne que les careaux seront blans.

Le ieudy iiij. iour, si fait grās vės les  
bānieres ne serōt point à repos, & les  
mousches ne scauront voller.

Le vėdredy v. iour, si thonne sera si-  
gne de tēpeste & aussi qu'il esclairera.

Le samedi vj. iour, si chet grāde abō  
dāce d'eau sera signe q̄ les ruisseaux se-  
rōt pleīs, & le mōde ne pourra passer.

Le dimēche septiesme iour, se le so-  
leil luist & ne pleuue point ce sera si-  
gne de beau temps.

*Fin de la prognosticatiō pour tout iamaīs.*

